

## Biografia di Mario Joaquin Croes

November 2019

**Mario Joaquin Croes** a nace na Aruba, na Lago Hospital, dia 16 di Augustus 1941. Number di Mario su tata ta Julio Conrado Croes, su number di cariño ta, “Juchi”. Su mama yama Ruperta Croes, conoci como “Betty”. Su tata ta diescincos aña mas bieu cu su mama. Mario a nace na Sta Cruz y ta ey el a crece tambe. E tin un ruman mayo y total nan ta diesun ruman. E ta number dos. Mario tin un partner pa hopi aña caba. Su number ta Candelaria Petronilia Koolman. Su fecha di nacemento ta 2 di februari 1956. Mario tin tres yiu, e prome ta Arondino Croes, su fecha di nacemento ta 5 di september 1964, e di dos ta Alvin Francis Croes, su fecha di nacemento ta 29 di januari 1966 y e di tres ta un yiu muhe, Marilinda Ariana Croes, kende a nace dia 7 di augustus 1989. Mario tin mas rumannan cu tabata tocado di un instrumento musical. Entre nan, su ruman difunto Armando Croes (Mando), kende tabata un guitarista. El a studia na conservatorio y Mario tin otro ruman difunto Frans, tambe Robby y Robert ta toca guitarra. Un otro ruman Romeo, a participa den hopi tumba festival tempo di carnaval cu e cohunto di Brazil Sensacion del Caribe. Mayoria di e rumannan tabata toca y nan yiunan tambe, pero nan no a uza e tocamento como nan profesion.



### Segun Mario el a biba e bida artistico cu hopi disciplina

**Segun Mario  
cu musica a  
hib'e hopi  
parti di mun-**

Como musico Mario a topa hopi hende, musico, amistad y hopi alegria. E ta bisa cu e musica a hib'e hopi parti di mundo; el a yega di toca na Corsou, Venezuela, Puerto Rico, Mexico, Merca y Hulanda, Cu e trio nan a bay diferente luga pa representa Aruba. Mario ta bisa cu e parti ey ta bunita, el a biba bon y dushi, es decir door di tabata un musico, cu disciplina el a dedica hopi ora na musica y semper esaki ta tene bo alegre y contento. Musica no ta caba! Tur dia algo nobo ta bin acerca y esey ta e parti bunita di dje y cada bes bo ta topa cu musiconan grandi. Esey ta loke ta haci e bida musical mas interesante.

### E bida artistico

Na edad di nuebe pa diescuater aña, esey ta mas o menos na 1950, Mario a hay'e ta bay biba cerca Mo Frans yiu di Mo Tito. Nan tabatin e cohunto Folklorico Arubano. Hopi biaha e tabata presencia ensayonan di e cohunto y esey a dun'e gana pa e tambe drenta den e parti di musica y toca. Mo Frans mes y su tata tambe, ta toca guitarra. Nan a cuminsa yud'e pa e por a cuminsa toca. Su tata a regal'e un guitarra. Cu su diestres aña, el a bay scol di musica, Arubaanse Muziek School e tempo ey. El a tuma les cerca Sr. Stam na Club San Martin na Santa Cruz durante un aña, anto asina ey el a drenta e mundo musical.



Motito y su Cohunto folklore Arubano

E tabatin amigonan cu ta tuma les hunto cu ne. Nan ta practica hunto de bes en cuando y asina nan a bin riba e idea pa forma un trio e tempo ey. Cu su diescuater aña nan a forma e trio Los Madrigales. Cu e trio nan a participa na algun comedia tambe. E tempo ey nan ta yama nan: belada, ?) e cabaret, pues nan kiermen comedia, pero den

forma di ta parti di esaki, pues no presenta un solo historia. Anto durante e comedianan ey, nan a cuminsa toca cu e trio den e parti di presentacion di e comedia. Nan a actua tambe como comediante y tambe como musico cu e trio. Nan tabatin un Arubiano cu ta canta Ranchera cu nan, mas o menos na aña 1956 pa 1957 cu nan a participa den dos comedia. Durante di e periodo ey tambe, Mario a tuma les di trompet y el a forma parti di e presentacion “Nan cu nan”. Mario a toca trompet den un banda cu nan a forma bou direccion di Donny Pieters. E ta corda un di e pisesanan tabata

“Piano merengue”. Tabatin mas piesa cu nan a toca cu e ta corda y asina ey Mario a sigui drenta e bida musical. Mas o menos na aña 1958 nan a organisa e unico festival di trio na Aruba. E tempo ey a participa 30 diferente trio, anto e honor grandi ta cu nan tabata jong cu e Trio Los Madrigales. Mario mes tabata tin 17 pa 18 aña. Nan a participa hunto cu trionan famoso di Aruba e tempo ey.

**Cu tur e edad hoben cu nan tabatin, di a sali na di dos luga. Esey ta un parti hopi historico pa Mario.**


Anto e ta corda Trio Los Conquistadores a sali na prome luga y Los Madrigales a haya e honor, cu tur e edad hoben cu nan tabatin, di a sali na di dos luga. Esey ta un parti hopi historico pa Mario. Pasobra na edad jong nan a competi cu trionan cu ta existi hopi aña caba. Indudablemente e ta un logro grandi pa nan. Tambe e por bisa cu

Concurso di Trio na Aruba



Participacion di Trio Los Madrigales

Mario a forma parti tambe di un grupo comico cu yama, Los Wois Wois. E grupo comico a pidi Mario pa e bin forma parti,



Los Wois Wois

pasobra nan tabatin mester di un guitarista. E mesun grupo tabata forma parti tambe di e comedia beladanan ? cu nan a haci, pues nan conoce Mario. El a bay presenta hunto cu nan den diferente teatro na Aruba, cantando y haciendo chistenan comico prome cu e peliculanan cuminsa e tempo ey. No tabatin hopi actividad na Aruba, pasobra e tempo ey, ta teatro di cine tabatin y clubnan social. Asina ta, cu tur hende hopi biaha ta bay wak pelicula.

## Dedicacion y estilo musical

Guitara ta e instrumento cu mas Mario a dedica su mes durante henter su bida. Fuera di guitara, tambe Mario a siña toca cuatro, mandolin y despues el a specialisa su mes hopi den fio. Pero e fio mas tanto e ta uz'e na fin di aña p'e core e paranda di dande. Durante henter aña Mario ta practica riba su fio. Cu guitara bo ta practica prome con bo ta posiciona bo dedenan, con pa tene e guitara y di dos bo tin cu siña diferente posicionnan cu tin riba guitara. Bo tin prome, segundo y tercero, pero ta posicionnan cu bo mester siña. Ora bo toca un akkoord bo por toc'e na diferente luga y tur esey bo tin cu practica pa bo sa nan, ora bo ta toca. Den forma di trio nan no ta toca cu partitura y bo no ta ensaya cu partitura tampoco.

Ta conhuntamente e trio ta sinta, scucha e cancion y siña e melodia, anto nan ta busca e akkoordnan. E tempo aya, ciencia no ta di e avansa cu bo ta haya un partitura di un cancion unda cu ta. Pues, nan tin di scucha, busca e akkoordnan, anto hopi biaha nan mes ta aplica cierto akkoordnan cu nan ta desea. Den trio nan ta canta y e persona cu tin e miho bos ta canta e prome bos, e otro ta canta e di dos bos y e ultimo ta canta e di tres bos. Mario ta kere cu e ritmonan mas dificil, ta ora bo ta haya bo ta toca un danza. Mas leu despues, bo ta bay over den ritmonan internacional manera calypso etc. cu ta ritmonan mas dificil pa bo siña. Pero bo tin cu busca yudansa.

## Desaroyo musical

Mario a toca cu trio Madrigales for di diescuatro te cu su binti aña. Despues den e mesun periodo, el a toca cu e grupo comico Los Wois Wois. Mario a toca tambe durante e periodo ey cu Hermanos Musical. El a toca den grupo hunto cu su rumannan, pero despues el a forma parti di Trio Los Conquistadores. El a toca nuebe aña hunto cu Toni Thijsen cu diferente integrantenan. Pero prome cu esey, el a toca cu otro Trio di Balashi cu harpa y cuatro.



Mariachi Universo



**Trio Los Madrigales**

E la toca cu trio na Hulanda durante e periodo ey, ora el a bay cu vakantie pa shete luna. Tambe despues di 1980 mas o menos, Mario a bin join Trio Los Arubeños y cu nan e ta tocando te awe. Pero durante cu Mario ta toca cu trio los Arubeños, tambe el a toca cu mariachi. Nan tabatin mariachi Universo. Awor e tambe ta forma parti di Rondalla Universo di Aruba y asina ey, el a forma parti di diferente grupo. e.o tambe di dande. Cu tur esaki, bo ta haya un experiencia musical hopi grandi y valioso.



**Amigonan musical den parada di Dande**

## Grabacionnan realisa



Door cu Mario a bay yuda un primo di dje traha un introduction pa un cancion cu e a compone anto esey a motiva Mario pa e bay traha un piesa pa su mes. Mario a yega na un introduccion bunita cu el a gusta e melodia asina hopi cu el a dicidi cu e ta bay compone un cancion su mes. Mario a yega na un cantica di cumpleaños na Papiamento cu e titulo "Cumpleaños" conoci como "Fecha Glorioso". Despues a sigui "Recuerdo Penoso", "Abo t'esun", "Testigonan di Amor", "Un canto di bo yiu", "B'a declara mi" y Mario a graba tambe un cantica di Pasco titula "Un Pasco feliz".

Mario tin na tur, shete grabacion realisa. E prome cu Mario a haci ta ora cu e tabatin mas o menos diesnuebe aña.



**Trio Los Arubeños cu Naturalesa**



**Trio Los Arubeños cu presentacion di Pasco**



**Den Cristal Sound Factory hunto cu Hildward Croes (d.l.m.) ingeniero di Sudio**

## Acontecimiento cu Mario a considera mas importante den e bida artistico

E no por lubida e momento cu su composicion a sali na di dos luga den e unico festival di cancionan Mexicano na Papiamento. E di dos, ta ora cu nan a participa cu su composicion "Un canto di bo yiu" den e festival di Himno y Bandera a sali na prome luga. Esaki ta e momentonan cu bo ta sinti alegria. Tambe e por bisa e momento cu nan a haci grabacion cu cuarenta diferente Trio Internacional. Esey pa Mario ta algo hopi grandi. Tambe tur e biahanan cu nan a representa Aruba den exterior. Nan a yega di bay Merca na seis estado, hunto cu oficina di turismo, pa representa Aruba musicalmente. Esaki ta momentonan grandi cu bo ta representando bo pais.



**Festival Mexicano**

## Sugerencia pa futuro generacion

Mario ta haya cu e parti bunita di e bida musical ta pa bo yega na un nivel halto den musica. E mayornan mester guia nan yiunan pa nan drenta e parti di bida musical. E por ta algo otro tambe, por ehempel cantante of bailarina, loke sea, pero ta importante pa guia nan yiunan pa nan drenta e bida di arte of deporte. E lo bira parti di nan bida, anto ora cu nan ta cuminsa bira mas grandi nan ta cuminsa bay scol pa amplia e conocimiento mas ainda riba e ramo cu nan ta dedica na dje. Nan ta bay crece cu ne y cuminsando na un edad hoben, nan por yega hopi leu.

